

Datum: 27.02.2024.

Broj: 02-06-1069

TI BIH UPOZORAVA: PREKRŠENE PROCEDURE KOD DODJELE KONCESIJE ZA EKSPLOATACIJU PODZEMNE VODE U LIVNU, GRADSKO VIJEĆE TREBA POVUĆI SAGLASNOST

Vlada Kantona 10 dodijelila je Koncesiju za eksplotaciju podzemne vode na lokalitetu „Poljane“ bez pravilnog provođenja javne rasprave i pribavljanja potrebnih dozvola, a tom prilikom prekršene su brojne procedure, upozorava Transparency International u BiH (TI BiH). Zbog toga Gradska vijeće Livno treba povući uslovnu saglasnost koje je dalo za dodjelu ove koncesije, jer koncesionar „Dže-Co“ d.o.o. Livno nije ispunio većinu uslova koji su postavljeni još 2010. godine.

Prema dostupnim informacijama i Izvještaju radnog tijela Vlade Kantona 10 po ovom pitanju, javne rasprave nisu provedene ili nisu provedene u skladu sa zakonom, prethodna vodna saglasnost je istekla, a ostali vodni akti nisu pribavljeni, nisu izdate okolinske dozvole, nisu izrađeni Elaborati o rezultatima geoloških i hidrogeoloških istraživanja a saglasnosti za proširenje prostora su pune primjedbi i nedostataka.

Pored svega navedenog koncesiona naknada se ne plaća, a ovaj postupak dodjele su obilježile i druge nepravilnosti. Uz sve navedeno, Komisija za koncesije je konstatovala da bi se trebalo voditi računa o eventualnoj ugroženosti vodosnabdijevanja lokalnog stanovništva, a TI BiH je zaprimio brojne prijave građana sa ovog područja koji su ukazali na opasnosti po životnu sredinu i istakli da su sve odluke donesene bez javne rasprave i učešća javnosti.

Imajući u vidu sve navedeno, posebno izvještaje i odluke nadležnih organa, nezadovoljstvo mještana MZ Vidoši i drugih građana Livna, TI BiH apeluje na Gradska vijeće Livna da razmotri uslovnu saglasnost koju je dalo za dodjelu koncesije, i ako se utvrdi da uslovi nisu ispunjeni proglaši prestanak važenja ove saglasnosti.